

DIE UNIVERSITEIT VAN STELLENBOSCH

INHULDIGING VAN DIE NUWE KANSELIER:

SY ED. DR. B. J. VORSTER

Kort Woord en Ampsbekleding deur die Rektor, prof. dr. H.B. Thom

(Vrydag, 3 Mei 1968, 8 nm.)

xx)

In die lewe van 'n universiteit, soos in die lewe van 'n volk, kom daar geleenthede wat besondere aandag trek en deur die nageslag onthou word. So 'n geleentheid kan 'n besondere hoogtepunt wees, en dan sal dit des te meer aandag trek en des te beter onthou word.

Dit is só 'n geleentheid wat die Universiteit van Stellenbosch vanaand beleef. Ons is innig dankbaar, en ons ag ons opreg gelukkig, dat ons nou as ons Kanselier kan inhuldig iemand wat reeds onomstootlike bewyse gelewer het dat hy met die grootste bereidwilligheid ál sy kragte aan sy land en sy mense wy, en wat veral ook die bewys gelewer het dat hy die blywende belange van die jeug van Suid-Afrika met groot erns en toewyding dien. Dit is vir ons 'n eer en voorreg om aanskouers te wees van, en deel te neem aan die inhuldiging van Sy Ed. dr. B.J. Vorster as Kanselier van die Universiteit van Stellenbosch.

Ons betuig ons hartlike dank en waardering teenoor hom vir sy ongekwalfiseerde, spontane bereidwilligheid om hom vir ons beskikbaar te stel. Ons dank hom dat hy vanaand hier by ons is, en dat hy die middelpunt van ons verrigtinge kan wees. Ons waardeer dit ten seerste dat mev. Vorster hom vergesel het en hierdie verrigtinge saam met ons kan meemaak. Ons is bowendien dankbaar dat ons nuwe Kanselier hom reeds vanmiddag tot beskikking van die studente gestel het, en dat hy deur hulle met geesdrif en hartlikheid in die Stadsaal ontvang kon word.

By 'n universiteitsfunksie soos hierdie stel ons die aanwesigheid van so baie hoogwaardigheidsbekteërs ten seerste op prys. Die Voorsitter

het/.....

het reeds na hulle verwys. Dit sal my egter vergun word om met besondere klem melding te maak van die aanwesigheid van die kanseliers en rektore van ~~nagenoeg~~ al ons Suid-Afrikaanse universiteite. Ons is bly dat hulle hier saam met ons is; deur hulle aanwesigheid lewer hulle 'n belangrike bydrae om die inhoud en betekenis van ons byeenkoms te verhoog. Dit is goed om te weet dat Suid-Afrikaanse universiteite by sulke geleenthede hulle hartlike, wedersydse belangstelling in mekaar kan betuig.

In ons nuwe Kanselier begroet ons die Eerste Minister van die Republiek van Suid-Afrika. Ons begroet in hom die daadkragtige leier van 'n jong land, 'n land wat in 'n moeilike wêreld en moeilike tyd deur hom met insig, begrip en beginselvastheid gelei word. Ons begroet in hom die leier wat weet dat daar agter en onder die uitwendige simptome en manifestasies van tye en dinge die diepe kragte van die gees lê, daardie kragte wat skeppend en vormend inwerk om die uitwendige simptome en manifestasies teweeg te bring. Ons begroet in hom die leier wat, terwyl hy die materiële, die konkrete raaksien en daarmee rekening hou, die geestelike, die ewige as fundamenteel aanvaar, en vir wie die Goddelike steeds bowe-alles beslissend uittoon.

Ons begroet in Sy Ed. dr. Vorster 'n bekende oud-student van die Universiteit; en ook hieroor verheug ons ons. Want hy ken die Universiteit en sy mense, en hy sal die hoogste amp in ~~sy~~ ^{ons} Alma Mater met insig en kennis beklee. Terselfdertyd begroet ons in hom die jongste Kanselier wat Stellenbosch nog gehad het. Hy het hom in die volheid van sy lewenskrag vir ons beskikbaar gestel; hy is vir ons almal, en insonderheid vir ons studente, in die tyd waarin ons lewe 'n ware simbool van dinamiese denke en van klinkende daade. ^{Om 'n man van hierdie} ^{skil} ^{waardigheid} ^{mm} gehalte as sy Kanselier te ontvang, is vir die Universiteit 'n groot eer en buitengewone voorreg.

✕ ✕ ✕ ✕

Dit doen my genoë om, namens die Raad en die Senaat, namens die studente en die oud-studente, kortom namens die Universiteit as geheel, oor te gaan tot die ampsbekleding van die Kanselier.

Ek/.....

Ek verklaar hiermee dat Sy Ed. dr. B.J. Vorster, in ooreenstemming met Artikels 44 en 45 van die Statuut van die Universiteit van Stellenbosch, deur die Konvokasie eenparig tot Kanselier van die Universiteit verkies is, en dit doen my genoeg om hom nou ~~hiermee~~ sy akademiese drag om te hang.

Ons wens hom as Kanselier 'n lang, vrugbare en gelukkige ampstyd toe; en ons wil hom in sy hoë amp verseker van die hartlike ondersteuning van almal wat met die Universiteit van Stellenbosch verbonde is.

H. B. THOM
(Rektor)

STELLENBOSCH,

3 Mei 1968.